



Antiquae Lectionis Tomus ...

In Qvo XVI. Antiqua Monumenta Ad Historiam Mediae Aetatis Illustrandam,
Nunquam Edita

Canisius, Heinrich

Ingolstadii, 1601

Epistola XXII. Venerabilibus in Christo fratribus in Ecclesia S. Leodegarij
Episcopi seruientibus. Alchvine, Devotvs Vestri Profectus in Christo
salutem.

[urn:nbn:de:hbz:466:1-64144](https://nbn-resolving.org/urn:nbn:de:hbz:466:1-64144)

Venerabilibus in Christo fratribus in Ec-
clesia S. Leodegarij Episcopi
seruientibus.

*ALCHVINE, DEVOTVS VESTRI PROFE-
sus in Christo salutem.*

Desiderabilem vestræ beatitudinis salutationem, quam meæ paruitatis auribus fidelis frater, ille, attulit, gratissimo suscepi animo: valde desiderans in vestræ sanctitatis orationibus, in huius procellosæ vitæ nauigio adiuuari: quatenus piissima Saluatoris nostri gubernatione ad portum perpetuæ quietis, vobis intercedentibus, peruenire merear.

Quod ad vos non veniebam, non alicuius (Deus testis est) despectionis causa feci, sed ne scandalum religioni vestræ, meæ inordinatæ conuersationis vita generaret, cupiens ædificare, & non destruere; congregare, & non spargere. Nulla est ouibus Christi maior damnatio, quàm pastor errabundus, & seductor per deuias orbitas. quomodo sequens viator viam incedet regiam? Nonne hastile aciem lanceæ sequitur in ictu?

Vos verò, fratres charissimi, totis moribus sanctorum patrum sequimini exempla. Illorum vnanimiter obedientiæ pedibus intrate vestigia. Caritas, obedientia, & humilitas monachis cœli ianuas aperient. Non illa caritas, quæ in pleno potatur calice, sed illa, quæ in pectore sine simulatione versatur fraterno: non sua quærens, sed quæ alterius sunt: omnibus prodesse, non sibi placuisse quærens. Non illa humilitas tantùm, quæ in capitis inclinatione foris ostenditur, sed illa, quæ in cordis consideratione ante

conspēctum summi iudicis, omnibus se inferiorem esse iudicat. Quid de obedientia loquar? Tota monachorum vita in simplicitate consistit obedientiæ. Pater verò & pastor Deo rationem reddet, quid iubeat; & quibus ante eos viuat exemplis. Sicut & filij, & grex; qua deuotione paternis obtemperant iussis, omnium iudici rationem reddituri erunt.

Igitur pacem, & concordiam ex intimo cordis affectu inter vos habete. Quia nihil sine pace Deo placet; nec munus ad aram. Vnusquisque alium, iuxta Apostolum, præueniat honore. Seniores, in spiritu mansuetudinis, quasi filios admoneant adolescentes: Sed & illi patrum præcepta, quasi diuinitus data, cum omni humilitate perficiant: seruantes in timore DEI, proprij castitatem corporis, vt Spiritus sanctus habitare dignetur in eis: dicente Apostolo, Templum DEI sanctum est, quod estis vos. Et in sanctorum Scripturarum lectione studiosi estote, vt possitis alterutrum edificare, & consolari. quia qui non vult in iuuentute discere, in senectute scire non poterit. Et sicut seculi avarus quotidie sibi diuitias augere studet: sic seruus DEI sapientiæ gazas in sui pectoris saccos quotidie congregare studeat, vt sit scriba in Ecclesia doctus, proferens de thesauro cordis noua & vetera. Erudiens multos, sicut firmamentum stellis ornatum in perpetua fulgeat beatitudine.

Matth. 13.

Dan. 12.

Non me, obsecro, præsumptuosum æstimare fratres, ob huius admonitionis chartulam. Sed quod charitatis lingua dictaui, vos humilitatis perlegite oculis, meamq; fragilitatem orationum auxilio vestrarum roborate, vt DEI donante clementia, peccatorum meorum merear accipere veniam, ac vobiscum desiderabilem audire vocem; Venite benedicti patris mei: percipite regnum, quod vobis paratum est ab origine mundi.

G 2

EPI-